



TaT mobile per la suprastanza cumünala

Per simplifichar il tgnair nota da las uras da lavur vain eir per la suprastanza cumünala introdüt in schner 2019 ün sistem electronic süil telefonin chi's nomna TaT mobile (TimeAferTime). Da quist sistem fan fingià hoz divers collavuratur dal Cumün da Zernez adöver. Il sistem electronic es gnü sancziunà.

Introducziun da la plattafuorma "Der digitale Dorfplatz für die Gemeinde Zernez" - dumonda da princip

La suprastanza cumünala ha deliberà ün credit per laschar realisar la plattafuorma „Der digitale Dorfplatz für die Gemeinde Zernez“. L'idea es cha'ls abitants dal Cumün da Zernez, societats, firmas, gastronomia, hotellaria, la scoula, pumpiers, cultura, quartiers, otras gruppaziuns d'interess ed eir il cumün fuorman gruppas per comunicar l'ün cun l'oter illas gruppas. La plattafuorma vain preschantada a la conferenza da presidents dals 24 schner 2019. La suprastanza ha dat glüm verda per l'inizi dal proget.

Zernez Energia 2020 – dumonda da sustegn

La suprastanza ha sancziunà üna dumonda da sustegn per sanaziuns energeticas d'abitaculs illa fracziun da Zernez our dal fondo Zernez Energia 2020.

Zernez Energia 2020 – premi d'energia

Il Cumün da Zernez ha surgni dal 2014 da la „Zürich-Klimapreisverleihung“ ün premi pel proget Zernez Energia 2020 da la „Zürich Klimapreis Schweiz & Liechtenstein“. La cumischiun da proget Zernez Energia 2020 ha davo divers stüdis decis da vulair pajar oura l'import surgni in connex cun quist permi in üna recugnuschentscha sün basa da criteris al proprietari d'ün abitacul da la fracziun da Zernez, chi ha raggiunt la meglra sanaziun energetica da l'on. Cun quist agir as voul eir far gnir plü cuntshaint tuot il proget Zernez Energia 2020 in cumün.

Ledscha cumünala da seguondas abitaziuns - procedura d'intervenziun

La procedura d'intervenziun da la revisiun da la planisaziun locala da la ledscha da seguondas abitaziuns insembel culs plans da l'uorden fundamental e register/inventar d'edifizis characteristics pel purtret da cumün es gnü approvà e deliberà a man da la radunanza cumünala dals 4 avrigl 2019. La votaziun a l'urna es previssa als 19 mai 2019.

Protecziun da las auas - procedura d'intervenziun

La decisiun da la suprastanza cumünala regard la procedura d'intervenziun da la revisiun da planisaziun locala da la protecziun dal spazi da las auas ha stuvü gnir spostada sülla fin favrer 2019. La procedura d'intervenziun es previssa da gnir trattada in suprastanza cumanzamaint marz 2019.

ICT – server 2019 – surdatta d'incumbenza

Il server cumünal es gnü cumprà dal 2013 ed ha uossa raggiunt ün'età cha'l riva adüna daplü a seis cunfins da prestaziun. La dumonda da credit es gnüda approvada a la radunanza cumünala dals 30 november 2018. L'incumbenza per la furniziun ed installaziun dal server nouv es gnüda surdatta a la firma AlphaCom a Domat/Ems.

Cumischiun da survaglianza „Chava d'amfibolit Crastatscha“

La suprastanza elegia a Fadri Guler sco president da la cumischiun da survaglianza „chava d'amfibolit Crastatscha“. Tras quai surpiglia Fadri Guler il post da presidi dad Alfred Barbüda.

Radunanza cumünala dals 16 schner 2019

Causa mancanzas da tractandas ha la suprastanza cumünala decis da desister sün l'organisaziun da la radunanza cumünala dals 16 schner 2019.